

Ra zapores sul prin gnee d'outon

Ra zena de i cazadore de ra riserva anpezana. El presidente noo Menardi, i sozie pi vece, i amighe ruade da fora

Par Bruno Menardi Menego 'l é stà ra prima ota da presidente de ra Riserva de ra caza, in Anpezo. Nuià de meo de 'na bona zena de i sozie, par se ciatà, se ra contà, vede el laoro fato, duto chesto co i pes sote 'na toura, che deenta duto pi bel e pi fazile. L é bel anche se pensà de ci che à fato ra strada ignante, par anes anorum, coscia 'l é stà dà 'na carta bergamina a Ernesto Franceschi de Matia, che 'l à scomenzà a sù a ra caza del 1963, donca sà sesanta ane; con el i s'è pensà anche de Marco Apollonio Varentin, sozio da 58 ane. Su chera carta che i à dà a dute doi, i à scritto su: »Preon che ra nostra crodes pode senpre mantegni ra zapores che t'as segnà

su 'l prin gnee, par 'l outon de caza«. Chesta tradizion de ra zena ra vè inaante da anes e i sozie i à gran acaro de se ciatà, un an dapò chel outro. I se ciata intrà de lore, ma anche co ra families, con chi de ciaša. Sto an 'l é ruà da Venezia i consiliere Silvia Cestaro e Gianpiero Possamai; par el distretto de ra caza del Cadore 'l ea el presidente Paolo Zanetti; 'l ea i presidentes de alcuanta riserve de ra provincia de Belun; con lore Alberto Colleselli e Guido Calvani, presidentes par ra provincia de ra associazios Federcaccia e Italcaccia; Michele Da Pozzo diretor de el Parco natural rejional de ra Dolomites d'Anpezo; par el Comun de Anpezo el loudaduó Giorgio Da



A ra zena de ra Riserva de ra caza de Anpezo: el presidente Bruno Menardi Menego intrà Marco Apollonio Varentin, sozio da 58 ane, e Ernesto Franceschi de Matia, sozio dal 1963.

Rin; 'l ea alcuante de ra Union de i Ladis de Anpezo e de ra compagnia de i Scizar Anpezo Hayden.

El presidente noo Bruno Menardi Menego 'l à contà algo de el laoro fato del 2022, pichesee de el zentro agnó portà ra besties, i selvateghe ciapade, che i à daerto de agosto de 'l an pasà a Socus, a ra fin de un zavarìo longo, scomenzà canche 'l ea presidente de ra riserva Adriano Verocai Daloio, portà inaante da Nicola Tormen, che ades 'l à lascià el so posto a Menardi. El projeto 'l é de 'l architeto Matteo Apollonio de Olo, anche el sozio de ra caza.

Dinultima, cemodo che se sore fei a sta zenes, i à tirà a sorte i premie, ciapade da trenta sozie.